

Apënëtal and axadac ayekax aŋ (Ŝaŋ 10.1-16)

Ata re ko bëte Yesu: Ðal in këmun felënd, ar bayik ax dilënd na gër ebët ed kece ir opeỹ do ko radand mo ndada an, arek axeŷax ex. Ðarikan, ar kë lilënd gër ebët an ex axadac ar opeỹ an. Anëkona ar ebët an këŋo ŝëgëntënënd exo dîl do opeỹ ok këni xwitand oniŵ orexëm ol. Ata ebi mac fac opeỹ odexëm ok ir ex kala gë oŵac orexëm ol eno tëfa. And këbi nęcët dek odexëm aŋ exo dëngw do bën eno tëfa ga ŵër këni oniŵ orexëm ol. Ar ano nange na an ado ebi macënd ano tëfana. Ata këni ŝapër eno ŋaŵëta gayik ani mëre na oniŵ or bëliyer ol. Apënëtal aŋo fel babi Yesu, bari bela bën abi pëni bana er baxo rend in.

Yesu fel këbi bëte: Ðal in këmun felënd, wëno ex ebët ed gër ed këni lilënd opeỹ el. Ðek bër yowëk namana me ŋatu bën bërek bëxeŷax ex. Ðari opeỹ ok anëbi baxëte na. Wëno ex ebët el! Ar kë xuca gër ndam an afex ko fex. Alil ko lil, aŝan ko ŝan do exo cot er ko yamb in. Arek an er ko yowënd wayët: orek, edaŵ, enëxëndëran. Ðarikan wëno er yow këme eni cot oyel oram aniyar aŋ do gë obetak or din ol.

Wëno ex axadac ayekax an. Axadac ayekax an, ayëlaya ko yëlayand, aãwelëk hi ko exo cës në end
oyel orexëm. Barikan, acuruga aŋ axadac fo këbi xadacënd oyel ol, abi kwëne na. Sam ebi watu
ojëlemu ok, oyel ol këbi ÿaŋëtand exo gër. Ata ojëlem ok oko enëbi tëra oyel ol, oko enëbi yëc eni
capër. Ahër ko hërënd acuruga aŋ gayik në end acosa fo këbi xadacënd oyel ol aŋo balënd na
endebën eŋ. Wëno ex axadac ayekax an. Anang nang këmëni oyel oram do bën anang nang këne;
ang nangër këmi wëno gë Faba ak. Aãwelëk hi këme me cës në end oyel oram na. Oyel ošëxe šot
këmëni na or ax gena gër kece ijo ro, afo mëni mëlaw. Oyel olo, awël këni ÿana eni wëlënd oniŵ oram
ol do mëni bar eni gi kece íbat, mëni kaxadaxënënd wëno gabat.